

## **La glesie di Aquilee e je stade une mari che nus à fats nassi e cressi come popul**

Vuê in cheste basiliche o fasìn la fieste de nestre Glesie. Parcè che al è tant vêr che si pues fevelâ di une Glesie sore e di une Glesie universâl, ma al è ancjetant vêr che ogni popul al à la sô Glesie. Tant par no sbaliâ, o disìn che ancje sant Pauli al fevelave cussì, e vuê o fasìn la fieste de nestre Glesie, culì, dulà che e à cjapât pît la religjon cristiane tal nestri paîs e tal nestri popul.

\*\*\*\*\*

Prime di dut, intune zornade come cheste, intune ocasion come cheste, o crôt che al sedi just di viodi ce che la nestre storie di cristians e di popul furlan e pues dînus intune di e intune ocasion di cheste fate. Parcè che no je une Glesie cualunche la nestre! No je une diocesute plui o mancul grande, plui o mancul vecje, plantade tal cors dal secui, ma e je une des Glesiis plui originâls di dut l'Occident cristian. E duncje, alc e varès di dî di particolâr. Jo o crôt pardabon che la nestre Glesie e à alc di originâl di dî.

I nestrîs vescuî a son stâts ancje i cjâfs politics dal nestri popul. Cheste no je une robe cualunche; e je une robe che storichementri nus dîs une grande realtât. Jo o crôt che e vueli di chê robe chi. La Glesie ca di nô, in Friûl, no si è mai tirade di bande des robis che a interessavin in chest mont il so popul. E à simpri riscjât; cualchi volte ancje le à induvinade, ma però no si è mai tirade in bande cul pretest di mantignîsi monde e nete e di no sporcjâsi lis mans. La nestre Glesie no si è tirade di bande dal so popul. E varà riscjât di fâ cualchi vuere di plui di ce che al coventave, ma le à fate par difindi il so popul.

Al è biel dîle in di di vuê, parcè che cul pretest di mantignî la Glesie pure, a son in masse in di di vuê, ancje chi di nô, copiant di chei altris, che a vegnin a dî che la Glesie no à di impacâsi pal so popul. E devi impacâsi, parcè che se no si impace tes vicendis dal so popul cuant che a son dificilis propite cuant che al è facil che le capissin malementri, nol covente che si impaci cuant che nol ocor, cuant che cualunche al è bon di judâle, di judâ il so popul. Che si impaci in chê ocasion.

E no stait a vê pôre che in cheste maniere si vedi di cjapâ il puest di chei altris, il puest de politiche. No! La Glesie e à di fâ lis robis che a coventin pal so popul cuntun parcè, cuntun mutîf difarent di chel che al fâs un politic, ma no fâ di mancul di fâ lis robis. E à di fâlis fevelant come che al fevelave sant Justin, l'amî di Jeroni, che al à balinât di zovin par chestis placis fûr di cheste glesie. Justin al dîs che la Glesie e à di fâ lis robis sburtade dal amôr di Diu, no dal amôr di chest mont. Ma e à di fâ lis robis. No à di fâ di mancul di fâlis parcè che si riscje di patîlis.

\*\*\*\*

Seconde robe. Mi pâre che la nestre storie di int e je cheste: che nô furlans o sin nassûts, cressûts, tirâts sù dai patriarcjîs di cheste Glesie.

Chi si pues dâ datîs precisîs. A son i patriarcjîs dal Mil in ca che a àn creât il nestri popul. A son lôr che nus àn dade la nestre originalitât di vivi, di fevelâ e di preâ. Int che e à vivût par tirânus sù, particolarmentri par dânus chel timbri di vite, chel timbri di fevelâ che o vin.

La nestre Glesie no è stade une Glesie cualunche. E je stade chê che nus à tirâts sù come

popul.

Al è biel dîlu chest an, dopo che finalmentri il pape di Rome, polac - e si è vantât di jessi polac! - al à dite che e je stade la Glesie che e à salvât, e à tirât sù, e à nudrît il popul polac. Gambiìn dome il non "polac" in "furlan". Al à dite ce che o intint di dî.

Culî al è just dî une robe dal gjenar. Nô furlans o varìn imparât, se o volês, anje a blestemâ, ma o vin imparât a crodi. Nô furlans o sin diventâts popul dulà che, par pôc che o stedin atents a ce maniere che o fevelin, o fevelin une vore di voltis doprant un lengaç che si dore in glesie te liturgjie.

La nestre e je une vite segnade dal calendari dai Sants. O vivin, o sintin lis robis e il cicli de nestre vite (nassite, matrimoni, muart e dutis lis altris occasions) come une celebrazion. E no sin bogns di celebrâlis se no in glesie. Par nô, la nestre Glesie e je stade une mari che nus à insegnât alc. E je stade une mari che nus à dât un colôr te muse; e je stade una mari che nus à insegnât a vivi. E si vantin. Dal sigûr, come cun dutis lis maris, cualchi volte o sarin anje bogns di mancjâi di rispiet; ma in fonts il popul furlan i vûl ben a la sô Glesie, parfin ai siei predis. Fra la Glesie di Aquilee e il popul furlan e je una robe che si è passade di ca e di là. Un al à influît su par chê altre, e chê altre e à influît sul nestri popul.

\*\*\*\*

E cheste e je la tierce robe che o vuei dî. Se o viodês i moments di decadence dal nestri popul, si inacuarzarês che a coincidin cuant che altris a son vignûts a comandâ chenti, tant eclesiastichementri come civilmentri. Int che no veve il nestri timbri. Int che no jere marcade come nô; int che e voleve insegnânus a vivi e cualchi volte insegnânus fintremai a fevelâ difarent di ce che o fevelin nô. Lu dîs chest anje pai miei coleghis predis. Ce vino di pensâ di chei predis o, come che al diseve il celebrant, di chei vescui che si son dismenteâts che par indreçâ il popul, par tignîlu in bontât, par mantignî la sô fede, si devi cjapâlu pal so viers, cemût che al è te sô vite, e no imponi un mût di vivi difarent di chel che al à, un mût di sintî, un mût di preâ, un mût di capîsi forest.

No si fâs pastorâl ni di predis ni di vescui, se no metintsi dacuardi e metintsi in simpatie, in sintonie cu la vite, cul mût di vivi, cul mût di crodi, cul mût di preâ, cul mût intîr di dâ fonde ae esistence dal propri popul. No si salve il furlan se no cuntune pastorâl furlane. No si ricostruîs il Friûl se no cuntune cjase e cuntune glesie furlane. No moderne e nancje antighe: furlane. E no si puartilu in glesie imponint mûts di preâ, mûts di assisti o di cjantâ, in cualunche manifestazion religjose che si puedi fâ in glesie, che no sedin nestris, nassûts chi.

Crodino che si deventi miôr? No, si devente miôr aprofondint lis robis, capintlis in profunditât, lant fin da fonts de robe par gambiâl, cence lassâsi impressionâ dai vistîts di chei altris.

\*\*\*

E finint, mi lassais dî una robe. Ta chês leturis che o vin fatis in cheste Messe, e jere di insom fin da pît la peraule "coragjo". Ca di nô, al covente. Al à coventât ai nestris vons tai disastri che a àn vût inte lôr esistence e nus covente a nô in dî di vuê. Coragjo par podê lâ indenant. Coragjo che nol vûl dî dome superâ lis provis che nus son capitadis, taramot comprendût. Nus covente coragjo, savêso parcè? Parcè che, a cjâlâ ben, cualchi volte ti ven la disperazion tal pensâ e tal viodi cetantis robis che a van come disfasintsi, che a van come pierdintsi. Cualchi volte ti ven l'aviliment parcè che tu viodis che te realtât religjose,

oltri che civîl, i sorestants no capissin ce che al covente e cemût che a vevin capît i grancj Sants fondadôrs de nestre Glesie pal passât.

Al è in chel moment che al covente il coragjo. Il coragjo al covente cuant che tu sês tentât di butâlu di bande e di dî: “Al è dut dibant!”. Al è in chê volte che al covente tignî dût, se no altri come simbul.

E o viodarês che il tignî dût, come che al diseve il vanzeli, al riscje di salvâ la nestre vite. La nestre vite di popul culî su la tiere e la nestre vite ancje religjose e eterne. Parcè che Diu, lui al à pazienze cun nô e ancje nô cun lui. Parcè che, in gjenerâl no ocor une orele masse vive par sintîlu, e ancje parcè che di solit nol à mai premure. Al rive cun calme, sigûr, e al salve. Però, o scugnìn tignî presint une robe dal gjenar, massime par un popul come il nestri. Se o fossin in cincuante millions di abitants, no i coventarès dîlis chestis robis. O sin li, ator dal milion. E ancje chi, mi torne tal cjâf la imagjin di pape Vojtile, che propit al à nomenât ducj i popui che a vivin ator dai polacs, ancje i plui piçui, ancje chei fats di cuarante, cincuante mil di lôr.

Nomenìnlu, sotliniìnlu il nestri. E no stait a dismenteâsi une preiere ancje par che i nestris vescui a cjapin coragjo. Se no lu àn che lu cjapin, che Diu ur al deti. Nô o spietìn un segn di coragjo. O volìn lâur daûr.

*Aquilee, Lui dal 1979  
fieste dai sants Ermacure e Fortunât*